



CASE F 39.326 1619fr FRENCH PAMPHLETS







1649 20^e. Parl. m 12.

3

LE PETIT DV MOVLIN

NOVVELLEMENT
apparu au monde.

Ou escrit du sieur Frizon à M. Forgemont
Docteur en Theologie touchant le Tableau
de mensonge de Rayneual, contre la Des-
couuerte dudit sieur Forgemont.

Item touchant la Preface ou Epistre du Bou-
clier de du Moulin Ministre du village
de Charenton.



A PARIS,

Chez IACQUES BARROYS, demeurant rue
S. Jacques, à l'enseigne de l'Imprimerie de
taille-douce au dessus de S. Benoist.

M. DC. XIX.

Avec Approbation & Permission.

THE NEWBERRY
LIBRARY

Casé

F
39

326

1619 *fr*

APPROBATION.

Nous soubsignez Docteurs en Theologie de la faculté de Paris, certifions auoir leu le liure intitulé, *Le petit du Moulin* nouuellement apparu au monde, auquel n'auons rien trouué contraire à la Religion Catholique Apostolique & Romaine, ains iugeons deuoir estre mis au iour, pour destruire l'erreur. *Fait à Paris ce 22. d'Auril, 1619.*

De Raconis.

Lambert.



LE PETIT DU MOULIN

nouvellement apparu au monde.

Où escrit du sieur Frizon à M. Forgemont
Docteur en Theologie, touchant le Ta-
bleau de mensonge de Rayneual, contre
la Descouuerte dudit sieur Forgemont.

Item touchant la Preface ou Epistre du Bou-
clier de du Moulin ministre du village
de Charenton.



ONSIEVR ET SINGVLIER AMY,
Vostre grande vertu, & excellent sça-
voir est le diamant & la fueille au cha-
ton de la bague & du rond de l'amitié,
que les gens de bien vous portent :
C'est pourquoy ie n'estime pas à petite faueur d'e-
stre chery de vous, en suite dequoy ie vous aduer-
tiray que ces iours passez tomba casuellement en
mes mains vn liure composé contre vous, ou plu-
stost contre la doctrine œcumenique de l'Eglise
Catholique, au frontispice duquel i'ay leu ceste
denise en grosses capitales, LE TABLEAU
DE MENSONGE, dont l'auteur est vn Es-
cuyer qu'on appelle Le petit du Moulin sieur de

4

Rieneual, à ce que disoit vn Courtisan la sepmaine passée en l'antichambre du Roy, à S. Germain en Laye; à quoy ie repliquay, Monsieur, vous alterez son nom de quelques lettres, vous voulez rire en l'anagramme, il se qualifie Escuyer & sieur de Raineual, non pas Rieneual. Je croys que vous l'appellez Le petit du Moulin, en consideration qu'il suit en tout & par tout le trac & les pas du Moulin son maistre, faisant à guise de certains predicateurs, qui vont imitâr la voix, les gestes, le port, le proceder au discours d'autres plus grands & renommez Predicateurs, & sont baptisez du surnom de celuy duquel ils sont Etholoques. Ce petit du Moulin pinse mieux la chanterelle, à ce que l'on dict, d'un luth, qu'il ne fait le bourdon & la grosse corde de Theologie, & nonobstant il veut faire du Docteur, & sembler vn Pierre Lombard maistre des Sentences, ou vn Scotus le subtil, ou vn Alexandre Ales l'irrefragable, ou vn S. Thomas le Docteur Angelique, & neantmoins ne sçait que la simple gamme.

Je vous diray, Monsieur, que i'ay pris patience en la lecture de son libelle, lequel est composé de trois R. l'un Latin, l'autre Grec, & le troisieme Hebreux r. p. 7. errores.

R. habet Ansonium liber ille, habet atque Pelasgum

R. habet Hebræum, prætereaque nihil.

Et de fait il est ignorant de tout point au fait de Theologie, & nonobstant il a osé entreprendre la Responße & Replique du liure que vous auez fait imprimer depuis peu, intitulé La descouuerte des fausses consequences des Ministres de la pretendüe Religion reformee, qui enferme & contient

soixante feuilles , & presque toutes les matieres
des controuerses comprises en cent quatre vingts
deux Chapitres, ausquels il a cuidé satisfaire en se
proposant dix hui^t propositions diametralement
opposées, qu'il desduit avec tant d'ignorance, im-
pertinence & bestise, qu'on se fust moqué de vous
si vous eussiez pretendu exactement voir & exami-
ner leslites propositions , & entrer en lice avec
cet Argoulet de Theologie; Iugeât bien que mes-
sieurs les Ministres mettent à coquer de ce lac
mouillé leurs erreurs qu'on fait voir au iour & à
l'œil, quand ils ont respondu quelque chose, soit
à tort, soit à trauers, soit de bond soit de volée, ainsi
que fait bien paroistre son maistre du Moulin au
Bouclier percé, où il se vanté impudemment à son
ordinaire de maintenir sa confession de foy par ex-
presse parole de Dieu, ou à contrepoil il n'apporte
que des consequences tirées par le nez des passa-
ges mal entendus, & selon le sens qu'il leur donne,
posant & supposant des principes mille fois refu-
tez par les Docteurs Catholiques, qui ont escrit
des Controuerses, & la maintenir aussi par des rai-
sons humaines, telles qu'il va phantasiant: sur les-
quelles comme sur vne arene mouuante le basti-
ment de sa Religio est appuyé & fondé pour crou-
ler bien tost.

Ainsi en faiët ce petit docteur Raineual, sans at-
taquer le donjon & le fort de vostre liure il denoit
monstrer que les consequences. que les Ministres
pretendus tirent de l'Escripture Sainte sont vrayes,
desquelles vous auez tres bien, & tres-doctement
monstré la nullité. C'est pourquoy laconique-
ment & briefuement tout ce qu'il a escrit con-

tre vous n'est nullement à propos & receuable: parce que vostre but & intention n'à esté de refuter les raisons qu'ils mettent en ieu pour la preuue de leurs heresies, mais seulement de leur arracher des mains la parole de Dieu expresse, ou les necessaires consequences, qu'ils s'attribuent faulsemēt. Quand donc ledit sieur Petit du Moulin aura respondu cathégoriquement, ou quelque ministre pretendu, sans chercher des eschapatoires, vous aduiserez d'y respondre.

L'on dit qu'il y a vne herbe en Sardaigne nommee Sardienne du nom de l'Isle, qui fait rire iusques à la mort, quine rira iusques à l'extremité de la grotesque & du Tableau de mensonge du sieur docteur de nouuelle impressiō, qui en son Auant-propos tout au beau commencement dit, que les Catholiques protestent ne se targuer d'autres armes que de la parole de Dieu, escrite pour les combattre, vaincre, abbatre & mettre en vau de routte: ô la fausseté! il taist malicieusement le reste, à sçauoir, *Parole expliquée par le S. Esprit, lors qu'il sera question de prouuer la nostre*, car c'est luy qui nous donne le vray sens d'icelle, par la bouche de son Eglise, suiuant la tradition Diuine, qui a continuée depuis les Apostres iusques à nous; mais non pas interpretee par cet esprit particulier qui leur groiille en l'occiput, lequel pēsent auoir tous les Huguenots, ainsi que dit du Moulin pag. 27. des pieces de son Bouclier, pour discerner la parole de Dieu, d'avec la parole des hommes, & recognoistre ce qui est bon & salutaire, conformément à leur article de foy.

Quand donc les Catholiques leur accordent de

receuoir la seule parole de Dieu escrite, formelle & expresse, ce n'est pas avec intention d'estançonner sur icelle nostre creance, en reiectant l'exposition de l'Eglise, comme presuppose le Petit du Moulin : mais leur accorder de grace ce principe qui est d'admettre la seule parole de Dieu, escrite formelle & expresse pour la preuue de leur religion pretenduë & condamnation de la nostre, qu'ils disent n'estre qu'inuentions humaines & controuuées à poste & à plaisir.

D'où s'ensuit que les Ministres pretendus agissans contre nous, en voulans refuter les Passages que nous mettons en auant pour la preuue de nostre foy, s'ils n'apportent que leurs explications & consequences, Neant; laissant donc à quartier les preuues de nostre Religion, qui toute difformee selon leur jargon, doit estre reformee par eux, art. 28. & 31. veu mesmement qui sont enuoyez extraordinairement pour cet effet, ils se deuoient contenter de prouuer leur Pretenduë religion, par textes expres, sans faire croire aux simples, comme faict du Moulin en son Bouclier faussé, & le Petit du Moulin en son Tableau de mensonge, en sa Babytone, ou plustost Babel & en sa cabale des Iesuites, pour laquelle il a eu bié la teste lauée sans fauon, que tous les Passages qu'ils produisent sôt tellement expres & si clairs qu'ils ne meritent aucune explication. Cela est autant esloigné de verité, comme le Ciel Empyré du centre de la terre.

Ce sont poincts opposez autant que l'Occident

Peut estre à l'Orient, l'Ourse au Midy ardent.

S'ils faisoient ce que dessus sans se trauailler de
monstrer les abus & erreurs qu'ils pretendent en

la Religion Catholique, ils porteroient la guirlande de l'auric, & emporteroient la Victoire: Car monstrant que leur Religion est vraye, celle qui luy est opposée & contraire, comme la Catholique, seroit recogneuë faulſe, ce qui basteroit pour nous faire renger de leur costé. Ce que n'ayans peu iamais faire, comme on les en deſſie, ils se sont iettez à cors & à cris aux conséquences non escrites, pour les faire valoir autant que la parole de Dieu escrite. Enquoy se descouure la tromperie la fallace & peu de foy des Ministres, comme il appert par vostre Descouuerte.

Tout ce qu'apporte le Sieur Escuyer trenchant de la Theologie, en son Tableau de Mensonge, cōtre ladite Descouuerte, ne merite estre refuté, par ce qu'il ne maintient comme vraye, vne seule des conséquences niées & improuuées par vous. Ce qu'il falloit faire pour directement impugner vostre liure, & non s'arrester à proposer des passages expliquez à sa phantaisie, sur lesquels il fonde la condamnation de nostre creance, bien que ce n'a esté vostre blanc principal de prouuer la Religion Catholique tant bien confirmée, par vne i-liade de saincts Peres & Docteurs, tant Leuantins qu'Occidentaux, qui ont escrit des Controuerses.

Vn seul Ministre n'a iamais au grand iamais respondu que par lambeaux, des Coqs à l'Asne, & des B mols en B quarres, en repetant vn million de fois le refrain d'une mesme chanson, comme faict du Moulin en son Bouclier de paille, laissant les principaux fondemens de nostre Religion bien prouuez.

Et donc pourquoy le sus-mentionné Petit du
Moulin

Moulin ne s'est il aduisé de monstrier leurs conséquences, desquelles luy & du Moulin son maistre, se seruēt, les monstrier, dis-je, estre veritables maintenant faulles par vostre sçauante plume, sans s'arrester à prouuer niaysement que l'Eglise Romaine est idolastre en enseignant d'honorer les Saints qu'il nomme adorer, à sçauoir d'un culte souverain, comme aussi les Images, ce qui est faux; à quoy on a respondu cent & cent fois, comme à ce qu'il pretend prouuer, que le Pape est l'Antechrist, & autres poincts de son Tableau vraiment destrempe en faulles couleurs de mensonge, pour lequel auctoriser il reiette, comme verres de rebutte, l'autorité de ce grand hableur & reformateur Calvin en ces termes. *Nous scauons bien que Calvin a peu errer & quand ainsi seroit qu'il auroit failly en quelque chose, il ne s'ensuiuroit pas qu'il eust failly par tout, & ce seroit à nous d'examiner ses escrits à la parole de Dieu, croire ce qu'il dict conformément à icelle, & laisser là le reste.*

Considerons l'arrogance de ce grand Escuyer, & de ce petit du Moulin qui se prefere à Calvin, lequel par le tesmoignage des assemblees Huguenottes, a esté enuoyé extraordinairement pour redresser l'Eglise de nouveau, tombée en ruyne & desolation, qui s'estime le plus sçauant de la Theologie pretenduë reformee, il auoit fort bonne opinion de soy, celuy que Beze & tous les Ministres tiennent pour leur bon pere, pour l'oracle de Delphé, pour le tres-fidele ministre de l'Euangile, l'irreprehensible seruiteur de Dieu, le vray Prophete, & la bouche du Seigneur (*Sous X^e & d^eu comme S. Basile appelle S. Gregoire de Nazienze*) homme

tel qu'on n'en a iamais trouué vn semblable, qui iusques à present ayt plus directement exposé l'Escripture sainte.

Si c'est à ce petit du Moulin d'examiner si Calvin a parlé conformément à la parole de Dieu, ne faut-il pas qu'il soit plus docte & plus intelligent que luy? Qu'il entende & interprete mieux l'Evangile que luy? Meilleur seruiteur de Dieu que luy? Qui est le Ministreau depuis l'establissement de leur pretenduë Eglise reformée qui se soit iamais bercé de cette vanterie? Où a-il pesché cette Theologie reformée? Quoy en fredonnant le luth? en tenant le cheualet de son luth? par le moyen de son esprit particulier, c'est à dire de ceste grace que Dieu donne aux benits Huguenots, & non aux pauvres Catholiques pour discerner le bon gair de la parole de Dieu d'auec l'iaraye de la parole des hommes, ou bien de cet esprit de discretion pour recognoistre ce qui est bon & salutaire qu'introduit du Moulin pag. 27. sera-il deuenu si sçauant, sera-il né en vne nuit comme vn champignon, pour estre iuge arbitre & examinateur de son Maistre Calvin; qui ne raillera de telle vanterie & thraconisme? Quand Calvin à manié l'Escripture Saincte n'auoit-il pas aussi bien cet esprit de discretion que ce Messire l'Escuyer pour discerner entre le vray & le faux, entre les diamants d'Allençon & ceux de Cambaya? Si comme homme il a peu faillir, ce petit du Moulin n'est il pas homme aussi bien que Calvin pour faillir? quand il voudra examiner la conformité de la parole de Dieu avec ses cahiers & escrits? Qui donc se pourra fier à l'esprit de ce petit Docteur contraire à

celuy de ce grand Patriarche Calvin pour en auoir la vraye intelligence.

De surplus si cet esprit a esté donné à Calvin par infusion d'alambic au bain de Marie pour estre l'un des premiers reformateurs de l'Eglise de Dieu, ne faut-il pas qu'il soit plus fort, plus puissant, plus certain, plus sçauant, plus asseuré, que celui du sieur petit du Moulin, pour n'estre examiné & iugé par luy en la conformité de l'Ecriture Sainte avec ses escrits. Je m'asseure que si Calvin reuenoit au monde il prendroit le chappelet d'un cheual & les estriuières pour quelque un comme l'on fait pour les laquais d'auoir esté si outrecuidé & temeraire que de se vouloir non seulement parangonner mais preferer à ce grand Soleil, dict Beze & lumiere du monde, que Dieu auoit enuoyé pour redresser son Eglise, lors qu'en un instant le iour de sa mort elle se retira au Ciel, ô pauvre Eglise!

Il adioute, que Calvin a peu faillir comme homme mais non pas en toute chose, c'est à dire qu'il a peu quelquefois parler non conformément à l'Ecriture sainte. S'il est ainsi, ou s'est allé promener ceste grace ou esprit de discretion que Dieu a promis à tous ceux qui l'ayment & le craignent suiuant la promesse de nostre Seigneur cotee en l'Euangile du bien-aymant & bien-aymé Disciple chap. 7. v. 27. Et au chap. 1. de sa 1. epist. comme dit du Moulin en son faux Bouclier, pag. 27. Quoy? Dieu aura-il manqué de donner cette grace tant nécessaire à ce premier restaurateur, soit en preschant, soit en escriuant, pour l'instruction de ses bien-aymez fideles, la reseruant à ce petit Docteur, & à son Maistre pour examiner si les presches & escrits sont au ni-

ueau, & selon la reigle de la parole de Dieu pour en croire ce qu'ils trouueront estre conforme à icelle.

Procedant ainsi n'est-ce point denier & renier toute certitude de foy diuine à la creance des Pretendus reformez, & toute assurance de salut à leurs errants & suiuants? lesquels n'en pourront iamais estre assurez, s'ils n'examinent avec l'esquerre & le plomb auparauant leurs Ministres s'ils parlent conformement à la parole de Dieu. Que fera l'abecedaire, qui ne sçait ny lire ny escrire, & qui n'a iamais veu ny tenu Bible: faut-il qu'il croye que ces ministreaux parlent plus conformement à la parole de Dieu, eux qui ne sont rien au parangon de Calvin selon l'opinion de toutes les Eglises pretendues, qu'ils n'ont en rien iamais accusé ce grand saint Calvin à la façon de Bretagne, ny condamné d'aucune heresie.

O qu'il est bien vray que ces Messieurs les Pretendus Reformez renoncent à leur Religion, & à l'obeissance des Pasteurs, laquelle Dieu commande au peuple, quand ils se constituent & se rendent iuges de la doctrine d'iceux: comme fait nostre petit docteur de celle de son Archipedaogue Calvin, lequel il confesse tacitement auoir failly, parce qu'il est conuaincu par les textes de ses escrits pour auoir esté le plus grand & le plus scelerat blasphemateur contre Dieu & contre Iesus, que iamais ait esté sur la face de la terre.

De quel escu & pauois se seruira ce braue Escuyer pour le defendre, sur quel barbe montera-il? S'il dit que c'est calomnie & imposture, qu'on lise ses liures entiers, on y trouuera les termes expres,

que vous rapportez syllabiquement sans y rien adiouster ny defalquer : S'il dit qu'on propose à contre sens ses blasphemes, qu'on lise vostre Descouuerte, on n'y trouuera rien changé ny alteré, s'il croit comme il dit *que Calvin a esté vn personnage grandement doüé de l'esprit de Dieu, par l'ayde duquel il a tiré & tellement esclaircy la verité des tenebres, qu'il faut estre plus auenglé qu'une taupe en plein midy pour ne le point cognoistre.* Cela estant, il doit deffendre sa doctrine, & ne s'en rendre aucunement iuge comme il faict, quand il la veut examiner & mesurer au compas de la parole de Dieu.

Quoy ? voudra-il maintenir que Dieu n'est point absolument tout-puissant? comme dit Calvin en ces mesmes termes en plusieurs lieux; Quelle exposition & quelle couleur donnera-il à ce blaspheme plus clair & manifeste que le beau iour; si Calvin a esté si grandement doüé de l'esprit de Dieu à son dire, pour esclaircir & donner iour à la verité, pourquoy niera-il de croire avec luy que Dieu a créé certains hommes pour estre damnez, puis qu'il l'a affirmé si peremptoirement en tant de passages liu. 3. de son Instit. chap. 21. §. 2. 3. 5. 7. 9. Que si le petit du Moulin ne le voit, il est plus auenglé qu'une taupe, & meriteroit d'estre enuoyé aux Quinze vingts de la porte de saint Honoré, Quelle impudence d'accuser d'imposture les Docteurs orthodoxes, quand ils representent au monde, que Calvin dit que Dieu pousse, suggere, necessite, & contrainct tellement les diables & les hommes à mal faire qu'il n'est plus en leur puissance d'y resister; Qu'on se donne la patience de lire les textes que vous avez recueillis de Calvin.

rapportez au chap. 73. de vostre Descouuerte : là l'on trouuera les susdicts mots exprellément, & d'autres encore plus horribles, qui feroient dresser les cheueux en la teste des mieux sensez.

Je ne me sçauois persuader que ce nouveau Athlete de Theologie ne se vueille ioindre avec l'esprit de Dieu, qu'il dit estre & reposer en Calvin pour esclairsir la verité & defendre sa doctrine, Qu'il defende donc ce que dit cet esprit diuin par la bouche de Calvin, qui a laissé par escrit liu. 1. de son Instit. chap. 13. §. 26. que Dieu le Pere est le commencement de verité, non pas en donnant son essence à son Fils, & au S. Esprit. Et aux Actes de Michel Seruet, lequel Calvin feit brusler à Geneue l'an soixante deux, que le Fils a vne substance distincte d'avec celle du Pere. Que s'ensuit-il de là, sinon que le Pere, le Fils, & le S. Esprit ne sont consubstantiels ny de mesme essence, & esgale puissance, ils seront *ὁμοιούσις*, mais non *ὁμοῦσις*, ains plustost d'autres Dieux que le Pere. Si l'Empereur Anastase du temps du Pape Hormisdas fut frappé & mourut de trois coups de tonnerre, pour auoir blasphemé contre les trois diuines Hypostases, il ne faut nullement douter, que Calvin plus grand blasphemateur est maintenant foudroyé en Enfer des coups plus espouventables du tonnerre des trois diuines Personnes.

Qu'on lise, de grace, ce qu'il a escrit contre Valentin Gentil, on verra encor pis, la fièvre tournée en phrenesie & chaud-mal; ce qui verifera que vous n'avez rien rapporté dudit Calvin qu'à la franche marguerite, & tres-veritablement contre la calomnie de nostre petit du Moulin; Il est bien

aysé à veoir que cet homme manie plus le luth
que les escrits de ses Docteurs, quand pour toute
defence il dit qu'on leur impose, & qu'on n'entend
pas leur intention : Belle & gentille responce d'un
ignorant pour contenter les ignorants, & ceux qui
nagent en l'ignorance.

Qu'il m'interprete cet esprit diuin, duquel est
doiïé Calvin, quand il luy faict dire escriuant sur
le chap. 26. de S. Matth. pag. 64. que seulement par
similitude trope & metaphore le Verbe est assis à
la dextre de Dieu son Pere, pour auoir le second
degré d'honneur & de cōmandement, & sur le ch.
6. v. 17. de S. Marc parlant des degrez de vie, il dōne
le premier au Pere, sur le 7. chap, v. 12, il le faict
vn Ministre du Pere : S'il nous reproche l'impo-
sture, qu'il lise vostre liure, & il cognoistra que
vous estes vn incorruptible entier, & fidele rap-
porteur de ce procez en vostre Descouuerte.

Mais que jargonne plus cet esprit noir de Cal-
uin du Fils de Dieu ? qu'il a douté de son salut, l.
2. de son Instit. chap. 16. §. 12. sur S. Luc chap. 2. v.
4. & sur S. Matth. chap. 24. v. 36. qu'il est tombé
en desesper, sur S. Matth. chap. 27. v. 47. & v. 57.
qu'il a enduré les peines des damnez, c'est à dire,
damné pour vn temps. liu. 2. de son Instit. chap. 16.
§. 10. Et puis il ne sera vray de dire que l'on void en
la bouche de ces Reformez.

Bistonij stabulum Regis, Busiridis aras,

Antiphata mensas, & Taurica regna Toantis.

Voila Monsieur & tres intime amy, ce que j'a-
uois à vous escrire touchant le petit du Moulin,
qui a voulu à guise d'un petit chien maltois, iapper
apres vn braue & puissant dogue d'Angleterre.

*Contre la Preface ou Epistre du Bouclier de du Moulin,
Ministre du village de Charenton.*

Vous me permettez bien, Monsieur, de vous entretenir encore quelque temps touchant le Maistre du Petit du Moulin, lequel suit sa piste & ses erres par tout. Vous sçavez que le sieur du Moulin a fait vne Preface à son Bouclier, qui peut estre faussé par vn festu, où il dépeint sa Religion, au prototype duquel le petit du Moulin à crayonné son Tableau de mensonge. Cette Preface sous le nom d'Epistre a esté imprimée à part depuis peu dedans Paris contre les Edicts du Roy, à fin de la faire courir: Je la refuteray brièvement, & en suite vous verrez la refutation de vostre aduersaire le Petit du Moulin.

l'examineray en premiere instance les reproches que nous fait le Ministre de Charentonneau, & les propositions fausses qu'il impose à la Religion Catholique, Apostolique, & Romaine, pour à contre-sens prouver sans probation son Irreligion.

1. Reproche. *Mais nous nous seruons de l'Escripture en toute autre façon que ceux qui vous enseignent, ce sont ses termes parlant aux Catholiques, car ils craignent que le peuple ne la lise, & nous luy exhortons.*

Responce, cela est faux. On ne defend point de la lire à ceux qui s'en peuvent sainctement seruir & lire sans presumption & outrecuidance de la mieux entendre que tout l'Eglise ensemble, & les Docteurs Catholiques en bloc & en detail, auxquels appartient de l'expliquer au peuple, & aux
igno-

ignorans de les escouter.

Quant aux Pretendus Reformez, ils mettent l'Ecriture entre les mains de tous indifferemment des Crocheteurs, Sauatiers, Rotisseurs, Lauandieres, Poissonnieres, Charcutieres, &c. avec toute permission de l'exposer, l'interpreter & la gloser, pour en croire ce que leur en semblera, & examiner si les Presches de leurs Ministres sont nipelées à la parole de Dieu : le tout pour tromper le pauvre petit peuple, & luy faire accroire qu'il la peut fort bien entendre ; Ce que S. Hierosme en l'Epiistre à Paulin nie formellement, disant ; *Les Medecins promettent ce qui est de leur art, les Artisans traitent ce qui est de leur mestier, la seule escriture est vn art lequel tous s'attribuent la vieille habileuse, le vieillard refuseur, le sophiste censeur, tous presument la sçauoir, la deschiuent auant que l'auoir apprinse.*

Ils vous persuadent dit du Moulin, que l'Ecriture est obscure & ambiguë, mais nous disons que toutes les choses necessaires à salut y sont couchées avec beaucoup de clarté.

Responce, du Moulin desment la mesme Escriture, qui dit en la 2. de S. Pierre, s. v. 16. qu'és Epistres de S. Paul il y a des choses difficiles à entendre, que les ignorans & mal-assurez corrompent, comme aussi les autres Escritures à leur propre perdition : ce qui ne se peut entendre que de ce qui concerne le salut eternal. Que ne monstrent-ils cette si grande euidence de l'Ecriture en la preuue de leurs articles de foy ? sans auoir recours à leurs consequences, comme ils font perpetuellement.

2. Reproche, ils disent, du Moulin parle, que l'Ecriture est vne reigle imparfaicte, & veulent qu'il y aig.

vne autre parole non escrite, & des traditions de l'Eglise, esgales en auctorité à l'Ecriture. Nous au contraire, disons que l'Ecriture sainte nous peut rendre sages à salut, & que nous ne devons estre sages outre ce qui est escrit; & qu'en ce qui est clair en l'Ecriture & n'ayant besoin d'interpretation, sont contenues toutes les doctrines necessaires à salut.

Responce, Il est faux que nous asseurions que l'Ecriture sainte soit vne reigle imparfaite, & qu'il y ayt des traditions de l'Eglise, d'esgale auctorité à l'Ecriture: Bien enseignons nous que la reigle de nostre foy consiste en la parole de Dieu, qui en partie est écrite & en partie nō écrite, & que celle qui n'est escrite prend son auctorité de Dieu, aussi bien que celle qui est escrite, & consequemment est d'esgale auctorité, en tant quel l'une & l'autre émane de Dieu: Que s'ils appellent ceste parole de Dieu non escrite, parole des hommes ou de l'Eglise, ils se forlignent du droit chemin; C'est ceste parole de Dieu qui nous rend entierement & parfaitement sages pour operer nostre salut; car pour estre tels il faut estre asseuré du vray sens de l'Ecriture, qui ne nous peut estre certain sans la parole non escrite, c'est à dire sans les traditions Diuines qui ont continué en l'Eglise seize siecles, depuis les Apostres iusques à nous. Que s'ils cuident qu'en ce qui est euident de l'Ecriture, & qui n'a point besoin d'interpretation, sont contenus tous les documents necessaires à salut, qu'ils le montrent en la preuue des Articles de leur confession de foy, qui ne sont fondez que sur leurs conséquences, & interpretations tirées de leur ceruelle mal timbrée.

3. Reproche. *Quand nous alleguons l'Escripture* (sont les paroles de du Moulin) *nous l'alleguons comme iuge souveraine, & comme celle qui regle l'Eglise, & luy donne auctorité : Mais l'Eglise Romaine allegue l'Escripture, comme vne doctrine auctorisée par l'Eglise, & qu'il faut recevoir, par ce que l'Eglise l'a ordonné.*

Responce, cela est faux : l'Eglise Catholique allegue l'Escripture Sainte, comme parole reuelée de Dieu, lequel ne peut estre trompé, ny tromper, & duquel elle prend entierement son auctorité, & non pas de l'Eglise, qui propose seulement ce que nous deuons croire de la parole de Dieu aux Rom. 10. v. 17. *la Foy est de l'oyè, & l'oyè par la parole de Dieu.* Donc ce que nous croyons estre veritable de l'Escripture, n'est pas en consideration que l'Eglise l'a ainsi ordonné, mais à raison que Dieu a reuelé telle chose en son Eglise : Quant à nos aduersaires, ils alleguent l'Escripture, comme iuge souveraine, à fin qu'eux-mesmes en soient les iuges independens, en luy faisant dire tout ce qu'ils pretendent pour la confirmation de leurs erreurs, comme il appert par les interpretations qu'ils luy donnent, & les consequences qu'ils en tirent. Qui voudra toucher cela au doigt, il ne faut que prendre le Bouclier de du Moulin, & le Tableau du Petit du Moulin.

4. Reproche. *Quand nous interpretons l'Escripture* (dit le sieur Ministre) *Nous ne baillons pas, comme fait l'Eglise Romaine, nos interpretations pour loix, & ne nous disons ny iuges ny interpretes infallibles de l'Escripture.*

Responce, Cela est faux, car il appert que quand les premiers Ministres, comme Martin Luther,

Iean Caluin, Vdaltic, Zuingle, Thodore de Beze, & autres ont interpreté l'Eſcriture ſaincte, non ſeulement leurs interpretations & conſequences ont eſté receuës pour loix fondamentales; mais auſſi leurs articles de foy en ont eſté baſtis: qu'ainſi ne ſoit, ils n'en ſcauroient monſtrer vn ſeul controuerſé, qui ne ſoit tiré de leurs interpretations & conſequences.

D'abondant ceſte grace & eſprit particulier que Dieu a promis à vn chacun, pour diſcerner la parole de Dieu d'avec la parole des hommes, ainſi qu'aſſeure du Moulin en ſon Bonclier pag. 27. ne fera-il point capable & ſuffiſant de donner vne doctrine infaillible; qui ſeruira de loix pour le gouvernement de la conſcience d'un chacun en particulier. Apres cela, quel beſoin aura-il d'autres loix; ſi cet eſprit eſt de Dieu, ce qu'il aura enſigné doit eſtre infaillible, & faudra receuoir ſon expoſition comme tres certaine & iudubitable: Si on en doute, ou qu'on n'aille pas bien diſcernant la parole de Dieu d'avec la parole des hommes, c'eſt à dire qu'on aſſeure le faux au lieu du vray, qui oſera aſſeurer que ſoit pluſtoſt l'eſprit de Dieu que le mauuais Genie du Demon? leur eſprit donques particulier aduocé par du Moulin eſt le vray interprete, & iuge ſpecial à vn chacun de l'Eſcriture ſaincte, encore qu'à bouche ouuerte il ne l'oſeroit confeſſer.

Touchar ce qui regarde l'Egliſe Romaine, nous aſſermons que quand elle voit vn paſſage clair, expreſ & manifeſte ſelon la lettre, elle n'a point recours à d'autres interpretations, qu'aux mots propres du paſſage, ſ'il eſt queſtion de quelque autre

passage difficile, obscur & ambigu, l'Eglise Romaine va voir le consentement des saints Peres & Docteurs, les Decrets des Conciles generaux, l'usage & pratique de tout temps observee par tout, & en tout lieu : ainsi elle se tiét bien assuree de la vraye interpretation comme infaillible, dictée du S. Esprit par la bouche de son espouse l'Eglise.

5. Reproche, *Finalemēt c'est le jargon de du Moulin, quand nous interpretons l'Escripture, nous tirons l'interpretation de la mesme Escripture : Mais l'Eglise Romaine tire ses interpretations de la parole non escripte, & de la tradition : Exemple, le pain que ie vous donne est la commemoration de mon corps.*

Responce, la lecture des liures des Docteurs Catholiques le dementira, & fera voir euidentement, qu'ils tirent leurs interpretations des passages de la parole escripte : Neantmoins en cas de debat, ainsi que nous auons dit, ils ont recours au cōsentement, usage & pratique de l'Eglise vniuerselle, que nous tenons estre assistée du S. Esprit, pour nous assurer, de ce dont nous deuons auoir creance en matiere de foy, & des bonnes mœurs. Quāt à ce qui ne regarde la foy, chacun l'extrait d'oū bon luy semble : par exemple, prouuant la realité du corps & sang de Iesus Christ en la sainte Eucharistie, en mettant en auant, *prenez mangez, cecy est mon corps*, qu'ils interpretent selon le sens litteral, tiré du chapitre 6. de S. Iean, où nostre Seigneur dit clairement, *le pain que ie vous donneray est ma chair pour la vie du monde, Ma chair est la vraye viande, Mon sang est le vray breuuage, sans alleguer la mādication par foy, ny spirituellemēt, ny figuralemēt;* Ils y adioustent la probation du S. Esprit, mise en

la bouche de son Eglise, qui n'est autre chose que la parole de Dieu non écrite & consentement de toute l'Eglise vniuerselle. A l'opposite les Religionnaires se contentent de cet Esprit de Dieu familier pour discerner entre la parole de Dieu & celle des hommes, promis aux petits saints Huguenots, & non aux Catholiques, ainsi que teste du Moulin pag. 28. en son Bouclier, & leur confession de foy art. 4.

6. Reproche, *Le grand mal est*, il parle de l'Eglise Romaine, *que ces traditions & enseignements ne sont pas seulement additions à l'Ecriture, mais des contrauentions manifestes, dont la seule Messe en fournit plusieurs exemples, &c.*

Response, les Traditions Diuines & Apostoliques, que recognoit l'Eglise Romaine, ne sont aucunement contreuenantes à l'Ecriture sainte, ains elles sont tellement necessaires qu'il est impossible d'estre aisé du vray sens de l'Ecriture sans les susmentionnées traditions. Je laisse à part les exemples qu'on en pourroit fournir recherchant la briefueté, & monstre au iour que ceux que du Moulin met en auant concernans la Messe, ne sont opposez à l'Ecriture Sainte, puis qu'ils ne repugnent aucunement à l'essence de la Messe; comme de parler en langage Latin, Grec, Hebrieux; communier sous vne espece ou sous deux; faire eleuation d'Hostie, la presenter au peuple pour l'adorer, assis ou debout, auoir des reliques des SS. sur ou dedans l'Autel, implorer les merites des Bien-heureux. L'Eglise a peu instituer tout cecy pour le bien & emolument du peuple selon qu'elle est inspirée du saint Esprit sans contrauention

quelconque à l'institution de Iesus-Christ. Tout le reste des exemples qu'il produit, est faux, demandant principes disent les Philosophes, & supposant resolu ce qui est controuersé avec nous, sans iamais l'auoir peu prouuer par parole de Dieu ny consequences necessaires, ce qu'il deuoit faire auparauant qu'estaller & debiter ses danrées & faussetez au simple peuple pourveritez infaillibles.

Voyons vn petit, si nous vsons de recrimination, quand nous leur maintenons que leur Cene est entierement repugnante à celle de Iesus-Christ, tant en ce qui concerne la substance, comme aussi les accidens.

Premierement, ils sçauent indubitabement que nostre Seigneur dict, de ce qu'il donna à ses Apostres, *Cecy est mon corps*. Quant à eux, ils n'oseroient dire de ce qu'ils donnent en faisant leur Cene, *Cecy est le corps de Iesus-Christ*, ce que donc Iesus a posé en la bouche de ses Apostres, estoit son corps: mais ce qu'ils tiennent en leurs mains & mettent en leurs bouches n'est pas son corps, ils disent bien qu'ils le prennent, mais non pas que Iesus leur donne, ains seulement la figure.

Secondement, ce que nostre Seigneur donnoit estoit son corps sacrifié, comme ses paroles le denotent apertement, *ce qui est donné, rompu, espendu pour vous*: & ce qu'ils baillent, n'est point sacrifié, ie leur laisseray tirer la consequence de ces premisses.

Tiercement, en leur Cene, *il n'y a que du pain, vin & soy*, En celle de nostre Seigneur estoit son corps present. Nous demandons si toutes les susdictes actions ne sont pas de l'essence du Sacrement & sacrifice institué par Iesus. Venons aux circon-

stances & accidens exprimez en la parole de Dieu, & les questionnons s'il leur est permis d'en alterer quelque chose.

Quartement, Nostre Seigneur celebra la Cene en vne sale, & les Pretendus Reformez au temple; luy la nuict, eux le matin; luy apres soupper, eux deuant dîner; luy à iun, eux bien gras & repeuz; luy avec des pains d'Asyme, eux avec des pains de leuain; luy avec des hommes seulement, eux avec hommes & femmes; luy apres auoir lauë les pieds aux Apostres cōuiez, eux sans lauer les pieds d'aucun: quoy qu'expressément il l'ait commandé; luy couché à la mode des Chinois & des Anciens, eux debout; luy laissant franc & libre à ses Apostres de discourir ensemble, eux faisant garder le silence; lesquels exemples sont tous contreuenans à l'institution de Iesus-Christ, & mesmes à la parole de Dieu; Ce que neantmoins ils gardent ric à ric contre leur maxime, qui est qu'en matiere de Religion & seruice de Dieu, il n'est loisible aux hommes, voire mesmes aux Anges d'y adiouster, diminuer ou changer puis que l'Escripture est reigle de tout hommage & seruice deu à Dieu; qu'ils alleguent vn seul passage de l'Escripture par lequel ils monstrent qu'il leur est permis de changer les susdites circonstances. C'est à quoy deuoient butter les 4. Ministres, quand Monsieur l'Euesque de Luçon a respondu à leur lettre pleine de mensonge, & impudence. Ce que du Moulin ne deuoit pas dissimuler, s'il eust eu la verité de son costé, comme il a faict ignoramment paroistre en son Bouclier, qui n'est qu'un amas des redites friuoles esparses en tous les liurets.

Il est

Il est bon maintenant de sçauoir s'il est veritable, que les Catholiques representent la Religion pretendüe, toute autre qu'elle n'est en la depeignant comme vn monstre affreux, hydeux, & espouuentable leur faisant dire choses entierement esloignées de leur creance.

Responce, Nous maintenons que les Catholiques ont bonne raison, parce qu'il n'y a rien de plus abominable que les heresies, dont est composée l'Irreligion. Pour en descouurir la verité nous leur demandons, où il faut que nous allions rechercher leur creance, & enseignemens sinon és liures de leurs Pasteurs, Docteurs, & Ministres: Car de leur demander en particulier, ce ne seroit iamais fait, autant de testes autant de caprices & d'opinions; Or est-il que les Catholiques ne representent rien de leur Religion hydeuse, qui ne soit escrit mot pour mot en leurs liures, comme vous l'auiez tres-bien monstre en vostre Descouuerte; à quoy ne pouuant repliquer, les Ministres ont trouué depuis peu vne eschappatoire, qui feroit rire vn Heraclite: C'est qu'on leur impose, qu'on prend leur doctrine à contre-poil, & qu'on leur impugne ce à quoy ils n'ont iamais pensé. Ainsi en a fait du Moulin en son Bouclier, & és 32. responce aux demandes que le Pere Coton luy proposa, lesquelles vous auez refutées en vos repliques doctes & iudicieuses.

1. *On fait à croire (c'est la 25. page du Bouclier) que les Reformez enseignent que les bonnes œuvres ne sont nécessaires à salut, bien qu'ils disent le contraire.*

Responce: Ce n'est point imposture de dire la verité, car qui ne sçait que ces nouveaux heretiques tiennent avec plusieurs Anciens leurs semblables, que la seule foy sans les œuvres iustifie?

Cela estant il s'ensuiura fort bien que les bonnes œuvres ne seruiron de rien à salut, parce que selon eux il baste d'estre iustificié deuant Dieu, & apprehender sa iustice pour estre sauué; ce qui se fait & parfait par la seule foy. Et donc dequoy seruiron les œuvres, car si la foy a cette énergie de iustifier, il est certain qu'estant sequestrée des autres vertus, elle retiendra tousiours sa force; & par ainsi pourra iustifier & sauuer sans icelles, & qui plus est associée des vices, à raison que comme la presenee des bonnes œuvres n'apporte rien à la foy pour le regard de la iustification, entant qu'elle seule iustifie; aussi la presenee des vices ne luy pourra causer de nuisance pour ce mesme respect: les bonnes œuvres donc seruent de neant pour estre sauué.

2. *Ils nous reprochent* (dit le maistre du Petit du Moulin) *que les esleuz peuuent sans nul danger se licentier à tout mal, ce que nous nions.*

Resp. Si c'est imposture qu'ils respondent de grace à l'vn de leurs premiers Reformateurs Martin Luther, que Caluin & Beze louient tant, lequel au liure de la liberté Chrestienne dit que, *comme nulle bonne œuvre ne profite au fidelle pour son salut, ainsi au contraire, nulle meschante œuvre fait l'homme meschant ny le damne, mais la seule infidelité.* Et au liure de la Captiuité de Babylone, chap. du Baptisme, *Tu vois comme l'homme Chrestien ou baptisé est riche, que mesmement voulant il ne peut perdre son salut par quelque peché que ce soit, si ce n'est qu'il vueille croire pour autant que nul peché ne le peut damner sinon la seule incredulité.* Caluin encherit sur ce marché au liure 3. de son Institution chap. 19. §. 2. 4. & 6. Où il assure que nos consciences ne sont obligées à la loy diuine pour estre punies en la transgressant, si nous auons la foy. Il defend le mesme pour le regard des loix

Ecclesiastiques, l. 4. c. 10. §. 1. & 2. Cela ainsi posé, où sera la crainte, qui nous doit tenir en nostre deuoir & en l'obseruance de la loy, & des bonnes œuvres? De surcroist, si celuy qui est fidele, est predestiné, & ne peut iamais perdre la foy, comme ils se persuadēt, ny estre damné pour les forfaits, qui est celuy qui ne se laissera emporter à ses plaisirs? Qui est celuy qui ne se donnera du bon temps sans aucune craintē de Dieu, ne se souciant d'obeir à ses saintes ordonnances? Qui est celuy qui ne lâchera la bride aualée pour courir à grand galop en la maison du mauuais riche, en la contrée de l'enfant prodigue, & au Magdalon de Magdelaine autrefois la Courtisane. N'est-ce pas, ie vous prie, licentier les esleuz à tout mal, comme à iuste tiltre nous leur reprochons.

3. Le sieur Ministre s'attriste, *qu'on leur fait dire, que Dieu ne donne point recompense aux bonnes œuvres. Ce qui n'est pas; car nostre Religioz croit que Dieu salarie les bonnes œuvres, mais d'un salaire gratuit.*

Responce. Il ne sçait & n'entend le mot de salaire qui n'est donné que pour le regard des merites, & selon le deub de iustice, & non gratuitement, Sainct Paul nous l'apprend aux Rom. 4. v. 4. *Le salaire n'est imputé de grace à celuy qui opere, mais selon le deub.* Neantmoins nous disons que nos œuvres considerées en leur estoc, & comme proueuantes du seul franc-arbitre, ne peuuent meriter la vie eternelle, si elles ne sont mariées auec la grace, qui n'empesche pas que nos actions accompagnées d'icelle ne soient vrayement merites selon le deub de iustice, & dignes de guerdon, en telle sorte que si Dieu ne les remunereroit il seroit iniuste, presupposé sa promesse, & le pact par lequel il s'est obligé de dōner son Paradis à ceux qui feront

bien en S. Matth. 20. Ce que les Religionnaires n'accorderont iamais, s'ils ne veulent donner le libelle de diuorce à la Religion de leurs Ancestres. Doncques ce n'est pas sans raison qu'on leur va reprochant qu'ils enseignent que Dieu ne donne point de salaire aux bonnes œuvres, lesquelles ils nient tout à plat estre meritoires.

4. Il adioulte page 25. *qu'on donne à entendre que leur Religion enseigne, que Dieu contrainct les volontez & les traine par force au mal.*

Responce. Il n'y a rien plus veritable si le Ministre ne faict point bande & Religion à part, & s'il s'en rapporte à ce que ses deuanciers ont laissé par escrit: Car qu'est-ce trainer nos volontez, & les contraindre à mal, sinon les y necessiter en telle sorte, que nous n'y puissions resister? Or est-il, que Calvin & tous les Ministres ne disent pas autres choses l.3. de son Instit. c. 23. §. 8. & 9. Vous en faites ample mention en vostre Descouuerte, és pages 344. & 355. si ma memoire ne me trompe.

5. Du Moulin ne veut pas que nous proclamions haut & clair, *qu'ils accusent Dieu d'injustice.*

Resp. Ce n'est point les arguer de calomnie, puis que Calvin a couché & laissé par escrit, l.3. de son Instit. c. 21. §. 5. *Que Dieu ordonne les vns à la vie eternelle, les autres à eternelle damnation; ainsi selon la fin, à laquelle il est créé, l'homme est predestiné à mort ou à vie,* & au c. 23. §. 5. & 7. du mesme liure. Je demande maintenant, si Dieu damne de sa propre volonté vn homme, & le crée pour le rendre miserable à tout iamais sans auoir au prealable faict aucun mal, n'est-il pas cruel, iniuste, le Dieu des Lestrigons, Cannibales, & Mâmelus? C'est ce qui suit necessairemēt & infailliblement de leur doctrine.

D'abondant, si Dieu damne les hommes, parce qu'ils ne practiquent pas ses ordonnances, les-

quelles leur sont impossibles, comme ils enseignent, voire avec sa grace, n'est-il pas vray, dites-le nous, du Moulin, que Dieu est iniuste, & tyran? Que si vous repliquez que cette impuissance fluë du peché qu'il a commis en Adam, on le niera conformément à vos maximes & principes qui sont, *Que le premier homme a peché, non à cause qu'il a voulu le peché, mais à raison que Dieu l'auoit ainsi ordonné, à laquelle ordonnance l'homme n'y pouuant resister, l'impuissance qui est en l'homme de ne pouuoir accomplir les commandemens diuins avec le peché, prouient de Dieu comme de la source, & non de l'homme; & partant Dieu est iniuste de punir l'homme pour n'accomplir ses commandemens impossibles.* Donc le reproche cy-dessus n'est point imposture.

6. Le Ministre n'a il pas bonne grace quand il veut persuader *que les Religionnaires honorent les SS. & la Vierge Marie, comme ces mesmes Saints ont honorez ceux qui les ont precedez.*

Que n'a-il dit de quel honneur; Pourquoi donc Calvin sur saint Luc c. 1 v. 34. impugne-il la Virginité de la Vierge des Vierges? & sur le c. 2. de S. Matth. Pourquoi Beze soustient-il en la 6. These que Iacques André Luterien luy proposa que Iesus-Christ est né de Marie à la maniere des autres hommes, & que son enfantement a esté sanglant; qu'elle est digne de blâme (ô bouche blasphemante) sur S. Luc ch. 1. v. 34. & c. 2. v. 17. & 35. Ne voila pas des beaux eloges, ne voila pas vn bel honneur, ne voila pas vn grand deuoir que luy rendent ces Messieurs? S'ils honorent les Saints où sont les mereaux & signes extérieurs de cest honneur? où sont les festes ordonnées à cest effect? les Panegyriques & harangues à leurs los & me-

rites? les prieres offertes en odeur de suauité? Calvin entend qu'ils ne iouissent de la fruition de la vie eternelle, iusques au grand iour du iugement, l.; de son Instit. c. 2. §. 6. qui est vn tres-bel honneur qu'il leur faict. Je laisse à l'escart plusieurs autres blasphemés contre eux, semez en leurs escrits comme en vn champ fertile de ciguë, & de Napel: Ce Ministre de Charenton ne pouuoit pas mieux se gaber des Religioneux, que de dire, qu'en leur Religion on honore les Saints.

7. Le Ministre ne veut pas que nous disions d'eux, *que pour cognoistre & discerner les liures qui sont vrayment parole de Dieu, & reigle de nostre foy, d'auec ceux qui ne le sont pas, ils ont dedans eux le tesmoignage & persuasion du S. Esprit, laquelle, dit-il, nous laissons aux phrenetiques,*

Resp. Les mesmes termes que nous leur allong reprochant de cest esprit particulier, sont exprimez en l'article 4. de leur Confession de foy; si bien que le niant, c'est renoncer à la creance de leur Religion.

De surplus en la section 7. pag. 27. il dict que *Dieu donne à ceux qui l'ayment & craignent la grace & esprit de discretion pour discerner la parole de Dieu, d'auec la parole des hommes, pour cognoistre ce qui est bon & salutaire.* Demandons luy ceux qui sont doüiez de cest esprit de discretion: il respond en la mesme page que les Catholiques en sont priez, à cause qu'ils iniurient les Escritures; mais eux, les seuls benits, qui ont la crainte & l'amour de Dieu empraînt en la volonté. Qu'est-ce là autre chose, si non se vanter arrogamment d'auoir vn esprit particulier? pour discerner la verité d'auec le mensonge, le vray sens de l'Ecriture d'auec le faux; & ainsi se constituer iuge de tous les differents de la Religion qui se presenteront en matiere de foy,

pourautant que cest esprit emanant de Dieu, il n'a que faire de celuy des mortels qui prou souuēt est menteur: Qu'ils ne trouuent donc estrange, qu'on leur reproche leur esprit vāteu, qui est plustot l'esprit familier du Diable, esprit de schisme & diuision, qu'esprit de Dieu esprit d'vnion & d'amour.

En outre, il proteste en sa Preface pag. 25. & 26. *qu'ils ne niēt pas la toute puissāce de Dieu en l'Eucharistie.*

Resp. Si cela est comme il n'est pas, pourquoy nient-ils qu'un mesme corps, en mesme instant, à scauoir celuy de Iesus-Christ, puisse estre au Ciel & en la terre, & qu'un corps glorieux soit en quelque part du mode, par la toute puillance de Dieu, sans ses dimensions, longueur, largeur, & espaisseur, & sans remplir le lieu. Qu'on jette les yeux sur le 1. blaspheme rapporté par vous en vostre Descouuerte, & on cognoistra les iustes reproches qu'on leur faict en ce sacré mystere.

Le Ministre du Moulin apres auoir representé en la Preface de son Bouclier d'enfant, quelques erreurs que nous leurs obiections, passant sous silence leurs blasphemes, & plusieurs autres heresies bien verifiées & inferées de leurs principes tēmez és escrits des premiers fondateurs de leur beniste Religion, il fait vne anatomie du squelete & carcasse de sa Religion touchant seulement quelques points qu'il a forgez & formez contre la creance des Catholiques pour tousiours vser de supercherie & tromper ceux qui ne s'arrestēt qu'à ce que les Ministres disent & elcriuent, sans faire autre inquisition de la verité.

Nostre Religion (pag. 27. de sa Preface) ne recognoist autre chef de l'Eglise, que Iesus-Christ, ny autre reigle de Foy que sa parole, ny autre sacrifice propitiatoire que sa mort, ny autre Purgatoire que son sang, ny autre merite que son obeissance.

Resp. on luy pourroit dire le mot Castillian *nunca* s'il l'entendoit. Il est bien vray qu'il n'y a qu'un seul chef inuisible de toute l'Eglise triomphante en Paradis & militante en terre, qui est Iesus-Christ, lequel est mieux recogneu d'un seul Catholique que de tous les Religioneux en gros: mais il est faux & contre l'Ecriture Sainte, que Iesus n'ait estably un chef visible pour policer son Eglise visible, partant de ce monde, & s'en allant à son Pere, à sçavoir S. Pierre, duquel parlant Theophylacte Archevesque de Bulgarie sur le ch. 21. de S. Iean, dit, *Ἰησοῦς ἐνεχείρησε μὲν τῷ Πέτρῳ τῶν πάντων τῆς ἐκκλησίας, ὡς πατρίαν*, Iesus a donné à Pierre la surintendance sur tous les fideles, ou bien comme parle auparavant luy S. Iean Chrysostome en l'hom. 1. de la Penitence, *τὴν ἐπιτοσίαν τὴν οἰκουμένης ἐκκλησίας* la surintendance sur l'Eglise esparse par tout le monde, & non seulement à S. Pierre, mais aussi à tous les successeurs de saint Pierre, l'un desquels, c'est le Pape Leon III. est nommé par Theodorus Studita, *ἡ τῆς κεφαλῶν κεφαλὴ* le chef de tous les chefs. Il est vray qu'il n'y a que la parole de Dieu qui est reigle de nostre foy entiere & totale, si par la parole nous entendons celle qui est escrite, & non escrite, ainsi que S. Paul nous enseigne en la 2. Epistre aux Thessal. 2. v. 15. & dire autrement, c'est nier la parole de Dieu, mesme celle qui est escrite.

Quant au sacrice propitiatoire nous n'en cognoissons point d'autre que la mort, ny autre Purgatoire que son sang, ny autre merite que son obeissance, si nous considerons la suffisance d'iceluy, & la vertu de nous racheter, laquelle il luy a pleu la faire nostre, & nous l'appliquer par le sacrifice de la Messe, qui n'est pas diuers en genre au sacrifice sanglant

sanglant de la 'croix , auquel la mesme Hostie est présentée sur l'autel en tous les deux, comme a dûement respondû Monsieur l'Euesque de Luçon en la refutation de l'Epistre des quatre Ministres de Charenton présentée au Roy, sect. 3. chap. 3. laquelle responce a esté vn baillon à ces 4. Ministres du Moulin, Durand, Montigny, & Maistrezat.

Je viens maintenant à considerer & examiner l'essence & les proprietéz de la Religion Pretendue Reformée selon le dire de du Moulin, à fin de descouurir ses faussetez, sa malice, & ses stratagemes desquels il vse pour tromper les esprits paturets.

C'est vne Religion, dit-il en la page 27. de sa Preface, *qui veut que le peuple lise la parole de Dieu, pour ce qu'elle ne craint point d'y trouuer sa cōdamnation.* Nous disons au contraire, que c'est vne Religion (où il seroit facile aux Huguenots d'entendre l'arrest de leur condamnation, s'ils n'auoient les yeux de l'entendement pochez, & s'ils n'estoient parties criminelles en ceste cause) qui permet au peuple de lire la parole de Dieu pour le piper & tromper, luy faisant accroire qu'il est plus que suffisant pour l'exposer, & en cognoistre le vray sens & intelligence moyennant qu'il ne recoiue autre sens que celui que Calvin, du Moulin, & les autres Ministres donnent à ceste parole. Comme si quelqu'un du petit peuple vouloit expliquer ces termes, *Cecy est mon corps*, de la realité comme nous enseigne le sens litteral, sans trope & figure; permettroit-elle au peuple la lecture de plusieurs autres Passages qui nous en donnent la vraye intelligence uniformément à celle des Catholiques; comme le ch. 6. v. 51. de S. Iean, *Le pain, que ie vous donneray est ma chair*: C'est de ceste source de laquelle toutes

les heresies fluent & decoulent abondamment.

C'est donc vne Religion qui sous le drap d'or & brocatel de la parole de Dieu donne au peuple les haillons de la parole des hommes, comme remarque S. Hierosme sur le ch. i. aux Galates. *L'Evangile de Iesus-Christ est fait par vne mauuaise interpretation l'Evangile des hommes.* Partant leur condamnation y est manifestement enregistrée.

C'est vne Religion qui fait accroire au peuple, que sans la lecture de la Bible, difficilement on se peut sauuer, Ce qui est tres-faux : car que dirions nous des aueugles, & de ceux qui ne peuuent lire, ou qui n'ont pas le pouuoir & l'auoir d'acheter vne Bible, ou qui n'y regarde iamais pour chercher leur salut. Mais s'en rapportent seulement à ce qu'en disent leurs Ministres: C'est ainsi helas, qu'on prend les pauvres petits oyseaux à la pipée.

C'est vne Religion qui met le ieusne sacré en telle abstinence volontaire, que sans distinction de viande elle permet de manger indifferemment tout ce que bon leur semble (comme le Ministre, lequel au ieusne qu'ils appellent d'Esther, mangeoit seulement la moitié d'un chapon quand il ieusnoit par abstinence & humilité reformée) & non pour rendre sa chair dyscole obeissante à l'esprit, comme ont fait anciennement tant de grands, braues, & Saints personnages qui ont tous vnamiment soustenu que le ieusne institué & commandé de l'Eglise fait en la grace de Dieu est meritoire & satisfactoire : ce que vous auez fort bien & sçauamment montré en vostre Descouuerte en la page 535, si bien me souuiens.

C'est vne Religion, laquelle pour attraper les simples au trebuchet leur presche tellement la fiance, qu'ils doiuent estre aileurez par certitude

de foy, qu'ils sont tous iustes deuant Dieu, & sanctifiez des le ventre de leur mere par la foy de leurs parents, tous bien heureux predestinez, sans qu'ils puissent perdre cette foy. O quelle presumption! ô le beau priuilege & preciput? lequel Dieu n'a iamais oëtroyé à aucun Saint, sinon à ces Messires Benoists.

C'est vne Religion qui d'une part assure impudemment que le Royaume des Cieux, ne peut non plus faillir aux Huguenots, qu'à Iesus-Christ: d'autre part que par leurs pechez ils ne peuuent estre damnez, non plus que luy. Calvin l'a dicté en mesmes mots qui ne se peuuent interpreter, comme fait du Moulin de tous les esleuz en general, mais d'un chacun en particulier: audace tres-grande, & iniure tres-insigne faicte à Iesus-Christ.

C'est vne Religion, où les hommes confessent & professent qu'ils ont souuent faict ce que Dieu a inhibé & defendu, mais en telle sorte que iamais ils ne peuuent estre punis pour les delicts & forfanteries, encore qu'ils en soient tous tarez & noircis sans auoir besoin de penitence, ny de crainte ou amour de Dieu; ny besoin d'en estre vraiment nettoyez ou lauez, mais couuerts & non imputez par la foy. Comme si la Passion theandrique de nostre Seigneur humainement diuine, diuinement humaine, n'auoit eul la vertu & efficace de nous entierement purger par le moyen des Sacrements, & autres expedients, qu'il a instituez en son Eglise.

C'est vne Religion qui n'a pas assurance de la promesse de Dieu par laquelle il s'oblige & se plaige de rendre à un chacun selon ses œuvres & selon son travail iournal, ainsi qu'il est couché en la parole de Dieu, luy mesme se rendant debiteur

de la vie eternelle à ceux qui feront bien par l'ex-
tremise de sa grace.

C'est vne Religion, qui à la verité ne fait point
d'images des Saints pour nous remettre en me-
moire leurs deuotions, leurs vertus, leurs pietez,
& conuier à les imiter : mais qui tasche de reform-
mer l'homme à l'instar & à l'image du Diable, rem-
plissant les ames des pauvres Religionnaires de
toutes sortes d'idolatrie spirituelle qui sont les er-
reurs des heresies condamnées par les Saints Pe-
res Grecs & Latins.

C'est vne Religion qui ne veut ny les chasses ny
les repositoires ny les reliques des Saints : à ce pro-
pos l'on lit sur le chemin de Chartres venant à Pa-
ris, vne complainte plaisante sous vne petite ima-
ge en relief, introduite parlant.

Huguenots qui par cy passez,

De mal faire ne vous lassez,

Ce petit Saint vous fait la nique,

Il n'a ny chasse ny relique,

Il en a eu, vous les auez,

Priez Dieu pour les trespasser.

Elle ne veut pas seulement les reliques ains elle les
brusle : les deuots Catholiques ne peuuent parler
du corps du grãd S. Martin bruslé par les supposts
du Diable qu'ils n'en pleurent à chaudes larmes : &
les Minimes lez Tours monstrent encor aujour-
d'huy le corbeau & manteau de cheminée lequel
est tout enfumé du grand feu fait lors que les Re-
ligionnaires bruslerent le corps du Bon-homme,
ainsi appelloit Louys XI. S. François de Paule.

C'est vne Religion qui enseigne que tous les en-
fans illegitimes & bastards sont damnez, & aus-
quels on ne doit point donner le baptême, ce qui
fust resolu par les Calvinistes au Synode tenu l'an
1579. & auparauant au Palatinat l'an 1587. dont le

decret est tel, *Infantes qui ex illegitimo matrimonio nascuntur, aeterna perditioni & damnationi obnoxij sunt, nec per baptismum iuuari possunt.*

C'est vne Religion qui asseure que Dieu dit faux en ses escritures, & que la certitude d'icelle doit estre appuyée sur la persuasion interieure du S. Esprit. Calvin le 1. de son Inst. ch. 7. §. 12. & ch. 7. §. 4. & son bon disciple Theodore ou plustost Theomague de Beze en ses Annotations sur S. Matth. chap. 27. v. 9.

C'est vne Religion qui trouue de l'erreur & de l'incertitude meslangée avec la foy. Calvin l. 3. Instit. c. 2. §. 3. & l. 4. c. 2. §. 4. 7. 16. 18.

C'est vne Religion qui veut que les tourments des damnez soient delayez iusques au iour du grād Iugement, & qu'il n'y aye point maintenant d'Enfer, Calvin l. 3. Instit. c. 25. §. 6. & l. 2. c. 16. §. 9. & sur le 30. ch. d'Esaie, & sur le 3. ch. S. Matth. v. 12.

Avec les Arriens elle asseure qu'il ne faut inuoker la sainte Trinité, Calvin l'enseigne en l'Epiistre qu'il a escrit aux Polonnois. Que le Fils n'est essentié du Pere, & qu'il a vne autre substance que celle du Pere, qu'il n'est consubstantiel au Pere, qu'il n'est esgal à son Pere, qu'il n'est absolument tout-puissant comme le Pere, l. 1. Instit. c. 13. §. 26.

Avec les Manicheans elle proteste qu'il n'y a point de franc-arbitre, que l'homme est necessité à mal-faire en telle sorte qu'il ne peut resister, & que la loy de Dieu est impossible: heresies refutées par les anciens, tesmoin S. Hierosme en la Preface du dialogue contre les Pelagiens, & S. August. l. 7. de ses Confess. chap. 38.

Avec les Pelagiens elle croit que les enfans des fideles sont sanctifiez dès le ventre de leur mere, & partant encore qu'ils decedent sans baptesme ne

laissent d'estre sauuez. Les Geleuciens & Armeniens condamnez tenoient le mesme erreur dict S. August. l. des heresies *Ad Quod-vult-Deum*, en l'heresie 59. & 60.

Auec les Nouatiens & Donatistes elle monstre, qu'il n'y a point de Sacrement de Confirmation, & qu'il la faut fouller aux pieds, telmoyn Optat Mileuitain l. 7. contre les Donatistes.

Auec Berengarius elle tient qu'en la sainte Eucharistie, il n'y a que figure de pain, & vin: auec les Arriens elle dit que la Confession Sacramentale n'est point necessaire, Theodoret le rapporte au liure des Fables des heretiques l. 4.

Auec les Massiliens, Albigeois, & Cathares, elle reiette tous les Sacrements d'ordre, & dit que les Sacrements ne conferent aucune grace. S. Epiphane & S. August. au l. des heresies, heresie 57. Auec les Arriens elle enseigne qu'il ne faut point dire de Messe pour les Trespassez, S. August. au l. des heresies c. 33.

Auec l'Empereur Iouinian elle met en mesme parallele le mariage & la Virginité. Auec les Cathares, elle impugne l'inuocation des Saints. Auec les Feliciens & Vaudois elle dict que les images de Iesus-Christ & des Saints sont idoles, telmoyn S. Hierosme l. contre Vigilance: toutes lesquelles heresies ont esté condamnées par l'Ancienne & primitiue Eglise, de laquelle nos benits Reformez se disent estre hoirs & descendents, & tenir la mesme doctrine, ce qui est manifestement faux.

C'est vne Religion qui prend sa source, son origine, & la vocation ordinaire des Albigeois & Vaudois heretiques errans és montagnes & valées du Dauphiné & Piedmont, selon le tesmoignage de du Moulin en son l. de la vocation l. 3. ch. 1. pag. 167.

C'est vne Religion qui enseigne que receuant

l'espece du pain en la Cene on reçoit le corps, & receuant l'espece du vin, on reçoit le sang de Iesus Christ separé du corps: notez de grace *separé*, & par consequent le corps de Iesus Christ mort, où pour se servir du mot de Beze au 2. des Actes v. 27. la charoigne de Iesus-Christ.

C'est vne Religion qui tend les bras ouuerts aux Moines defroquez, aux Prestres reniez, & aux Religieuses feditrages, coïeffant ceux-là d'une femme, embeguinant celles-cy d'un homme.

C'est vne Religion en laquelle les Huguenots sont enseignés par les escrits de leurs premiers Pasteurs, Reformateurs, & Archiministres de vilipender & mespriser les Empereurs, Monarques, Princes & Magistrats, leur cracher au visage, les reprimer, chasser, & depousseder, estans entachez d'impiereté, d'ambition, de dissolution, de paillardise, ou autres tels vices & imperfections, dequoy font foy Luther, Caluin, Beze, Melancthon, Muscule, Bulinger, Danæus, Buchanan, Goulard, Tassin, Merlin, & autres sans nombre.

Ils apprennent à leur desobeïr, ne receuoir leurs ordonnances, leur resister: ne point faire trefue ny paix avec eux non plus qu'avec Sathan, les eschafauder, iniurier, & appeller tyrans, aueugles, menteurs, miserables, fols, insensez, ennemis de Dieu, comme depuis peu à fait veoir à l'œil par leurs propres mots sacramentaux le sieur Bourguignon M. des Requestes de la Reyne, auparauiant Ministre.

C'est vne Religion finalement qui catechise, que tous les Roys tres-Chrestiens depuis Clouis, iusques à Louys XIII. que Dieu benisse à iamais, ont esté sans vraye Religion, meschans membres de l'Antechrist, pariures & damnez, voire mesme Louys IX. c'est à vous, bien-heureux S. Louys, qu'en veut cette Irreligion, vous estes à iamais bi-

heureux dedans le Ciel, voyãt le Verbe eternel face à face, & l'on vous recognoist tel par toute la terre, mesme de fresche datte le Pape Paul V. à la requisition de vostre petit neveu & grand fauoriz Louys XIII. vostre successeur a faict chommér par toute la France feste double de vous, & non-obstant cette Irreligion vous met en Enfer pour auoir esté de la Religion du Pape, qu'elle nomme Antechrist. Si maintenant ce grand Sainct le saint des fleurs de Lys, retournoit en terre, & interrogeoit le Ministre de Charenton du Moulin, s'il croit qu'il est en Enfer, que diroit-il?

Ie ne crois pas, Monsieur & tres-cher amy, pour le faire court & tédre à la fin, que le sicur du Moulin en son ame tienne sa Religion estre vraye Religion, ie ne doute nullement que dés long temps il se seroit rangé au party des Catholiques, si ce n'estoit quelque respect humain, quelque pansion du Roy de la grande Bretagne, quelque raison d'estat qui le destourne du droict chemin que le S. Esprit le doigt de Dieu luy va monstrant interieurement: il auroit plus d'honneur plus de moyens, plus de contentement parmy nous en vn iour, qu'il n'en a eu tout le temps de sa vie parmy les Religioneux, & apres cela la vie eternelle. Ie prie Dieu de tout mon cœur, cōme ie ne doute point que vous ne faictes, qu'il se conuertisse au bien, & puisse entonner avec le Chantre Royal Dauid, parlant à Dieu infiniment bon & misericordieux.

Tourne tes regards gratieux

Sur moy dolent & soucieux

Et me tens l'oreille propice

Seigneur, illumine mes yeux,

Qu'en la mort ie ne m'assoupisse.



